

Signór, e i deve i pì bieì nemai da la so stale ; so fradi invezi al puartave al sacrifici chei pì magris e pì bruz.

Il Signór al ere tant agrât des ufiartis di Abèl che jerin fatis di cur ; e Cain al ere tart invidiôs e al veve tante ràbie parcè che il Signór i voleve pì ben a Abèl. Une dì, che al ciatà so fradi in t' un lûc dulà che nissùn lu viodeve, di tante ràbie che al veve cuintri di lui, al lu copà a tradimènt. Ma' subite al ciapà pore dal Signór, e al lè a scuindisi in ta une buse indulà che nissùn lu podeve viodi ; e denànt de buse al plantà tantis spinis parcè che nissùn podès entrà dentri.

Il Signór che al sa e al viôt dut, al lu clamà e 'a i domandà parcè che al veve plantadis li spinis intòr di lui, « Par difindimi des béstiis » à i rispundè Cain. « Tu às fat ben : chês spinis 'e serviràn a incoronà miò fi — 'a i disè il Signór — Ma indulà isal to fradi ? » Cain nol saveve ce rispuidi. E il Signór lu maludì. Quan' che Cain al murì, al lè tal infiar, ma lui al clamave il Signór, e il Signór, in ricuart des spinis che al veve plantadis e che jerin destinadis a incoronà so fi, al ordenà che ogni gnot Cain al podès saltà fur dal infiar par là in ta Lune a messedà lis spinis. — E cussì al sarà par l'eternitât.

Cui che al ciale fis la lune, al cognòs tes sôs maglis Cain cun t' un braz di spinis su la schene.

I cambiamènz di Zorùt.

Sintin se sês contènz :

no uei tampieste ; invece tanc' confèz ;